

433
地
二

地430.61
941

慶城縣



縣志
通志
事畧

第一編 輿地志

第一章 沿革

慶城在五十年前林深草茂絕無居人於此而欲回溯歷代以來本地屬何國界歸何部落有何名稱既無文獻可考亦無遺跡可徵頗難着手即史籍所載古為肅慎渤海靺鞨等地係指滿州之全部而言若遼之上京路其範圍亦至廣縣境是否圈入以內遍行搜索未得確據志貴求實寧缺勿濫姑述所知近事之較切實者以備參考按縣境當未開墾以先原係蘇拉達子之圍場凡尼爾吉伊吉密額伊渾拉林青等河沿岸以及東西格木克南北長林子諸段均屬於此至清同治二年巴彥蘇蘇招戶開墾此地遂歸巴彥界

地433.65
491

內名為富家窩堡及同治五年有民戶于清來此築室到者接踵遂借于清二字之音以取義相沿稱為餘慶街漸有市面商業迨光緒十年縣西綏化設廳此地復劃歸綏化管界設分防府經歷於此至光緒三十二年設治時即本前餘慶街之名定名餘慶縣自民國三年四月二十三日因與南省縣名有雷同者奉文改為慶城縣此近來沿革之始末也

第二章 疆域

慶城治城在省城之東南距省城八百里原名餘慶街清光緒三十二年設治時定名為餘慶縣民國三年奉文改為慶城縣按慶城轄境東至鐵驪界六十五里西至綏化界四十五里南至巴彥界八十五里北至大石砬子一百五十里東南至東



興鎮界一百三十里東北至興東道界一百五十里西南至巴彥縣界七十里西北至綏化縣界四十五里全境廣一百一十里袤二百三十五里

按慶城設治未久來此佔荒開墾者各自就便築室不相聯屬以故城外並無大屯大鎮即民戶稍多之村落亦率無固定名稱惟代表以一人之姓字而已茲姑略為填註以備一例

一西何家屯在治城東八里

一王家歲子在治城西五里

一八大戶在治城南八里

一王公圍子在治城北八里

一高家圍子在治城東南六里

一郭家油房在治城東北六里

一周成窩堡在治城西南七里

一太平川在治城西北八里

慶城左抱鉄山右攬蘭水依東北為垣墉關西南為門戶假此天然形勝蓋以人力籌謀可為江省一方之保障矣

第三章 山川

一山脈 環慶城東南北三面皆山而以黑山為最著考黑山之脈起於內興安嶺南之布倫山逕迤西南至鉄山包之東北境起頂而為龍門山再南為大馬鞍山於是沿鉄山包東界南行至東南界起頂即名為青山再西北折至鉄山包之西南界名為大青山再西至慶城之正南界名為黑山由是山脈復西行南折以入於巴彥縣界至其支脈之繞轄境而西出北出者在慶城北境則有肯台山在東北境則有大疙疸山黑山之名有二而以慶城之正南界黑山為主高百餘丈綿亘不絕天

然形勢有足觀者

二河流 慶城之河流以呼蘭大河為正幹按呼蘭河環繞轄境二百五十里發源於鉄山包東南界青山脈西北流入慶城東界經過治城之北又直西經過綏化之北南折而達呼蘭入於松花江每年鉄驪縣東山所出之木材均由此河以運往下游銷售即本地所產之小麥大豆等亦賴以運轉出境誠最有利之河流也此外又有尼爾吉河由縣境北界西南流一百一十里至縣境西界入於呼蘭河有額伊渾河由縣境東北界西南流一百二十里至治城之北入於呼蘭河有大伊吉密河由縣境東北界西南流八十里至縣之東境入於呼蘭河有格木克河由慶城南界西北流一百一十里至慶城西境入於呼蘭河有拉林青河由慶城南界西北流九十里至慶城東境入於呼蘭河有穩水河由慶城東南境西北流七十里至慶城東界入於呼蘭河查上列各河其發源之處皆在鉄驪青山脈然多河身淤淺不能便舟楫較之呼蘭河其利益之大小相差遠甚

第四章 人種

縣屬人民計分七種曰滿洲曰漢軍曰漢族曰蒙古曰索倫曰回曰達呼爾按本地未開闢以前先有蒙古索倫兩種遊牧於此若尼爾吉額伊渾伊吉密格木克等名目即此兩族所傳留也自清同治三年放荒招墾由奉吉直魯遷來滿漢各戶盡務耕種游牧之生計不便而蒙古索倫其語言習尚又與滿漢不同未易聯屬遂退居山僻以獵獸為業至於回回則係多年經商於此而因以入籍者達呼爾則

係於前清光緒初年從軍於此而因以留居者據近來調查縣屬人民十三萬
惟漢族為最多而漢軍則占五十分之一滿洲則占百分之一至蒙古索倫回達呼
爾等則晨星寥寥不過僅備其類而已。

第五章 物產

縣境山環河繞土壯民稠以故農林漁畜等物產頗為繁備茲試列舉如下以備
實業家之研究焉

第一節 穀屬

縣境所產穀屬以麥豆粟玉蜀黍為大宗而黍與高粱麻子等亦為常產茲試
將各項之色性產量效用並播種收穫之時期叙述如左

第一項麥 按麥分大小二種大麥只足備飼牲畜及釀酒之用不可以供常食故
本地種大麥者少種小麥者多查小麥粒為淺赤色性微暖內中多含粉質磨為
面可做餅湯饅首等類為食用之高尚品播種在清明節後成熟須百二十
日產額每垧地可達三石七八斗

第二項豆 按本地所出之豆計分四種而以黃豆最多亦名大豆查黃豆粒為淺
黃色內中多含蛋白質及油質向來人民種豆專以供榨油及作豆腐作醬作粉
之用非常食品近以洋人盛買此項豆類價值頗昂故種豆與種麥並重播種
在立夏後成熟須百五十六日產額每垧地可達五石七八斗

第三項粟 按粟之一種本地土名為穀子粒為褐白色圓滑如細珠去皮為

米可以炊飯亦有用以造餅者為常食之主要品播種在立夏小滿之間成熟須百四十日產額每垧地可達六石餘

第四項包米按此項即玉蜀黍直省有名為棒子者本地土名為包米粒為黃色中扁平頂圓而下尖碎為小塊可以炊飯再碎之可以作粥亦有用以磨作餅食者價值與粟並重播種在立夏以後忙種以前成熟須百五十日產額每垧地可達六石

第五項黍黍粒似粟而色黃米可炊飯亦可作粥作糕本地常食除黍粟包米外以此為多播種後於小麥成熟須百二十日產額每垧地可達五石餘

第六項高粱高粱一名黍蜀粒為紅紫色米可炊飯作粥亦有用以作粉者原

為吾國北方之常食品惟本地所產味淡而稍澁只足備飼畜之物而已播種在立夏後成熟在中秋產額每垧地可達四石餘

第七項麻子麻子粒為圓形色為鼠灰大如桐子內中富含油質本地所出專供榨油之用惟其油性太燥食之足以令人眩暈只宜於燃燈擦器械而已播種在立夏成熟在中秋產額每垧地可達六石餘

第二節 蔬屬 附瓜屬

縣境所產蔬類極繁而民間習常食用之品則在於白菜土豆蘿蔔芥菜四項試列叙如左

第一項白菜按白菜分春秋二種春白菜土名為不老莖葉較秋菜稍為粗大味澁不

能適口至秋白菜其形狀視春菜稍細而高莖白葉綠內層黃白收熟後用水略一冲煮貯於缸中可備冬季及來年春間之用此即民間所呼為酸菜者也

第二項土豆按土豆原為本地土名形似日本瓜哇薯分紅白二種白種皮為褐白中質稍帶黃色性脆弱煮時易熟味且甘甜適口並可用以作粉故近來咸興白種土豆而紅種幾無種者

第三項蘿蔔蘿蔔即萊菔品種根為淺紅色頂平中圓而下帶尖鬚切為絲加以油鹽各料煮之可以食若晒成乾片蓄以禦冬更為佳品

第四項芥菜芥菜根為尖圓形小於蘿蔔色白而味辛秋末收熟後醃其根於缸中可為常年佐食品即俗所名為鹹菜者也

說明除以上所列四項外若葱、韭、茄子、北瓜、黃瓜、芋菜、芹菜、香菜、胡蘿蔔、菜豆角等亦均為土產然此皆不過為臨時之食用品且其色性形狀與收穫之時

期大約江省各處相同姑免煩叙

附叙瓜類

南瓜、北瓜、王瓜等雖有所出然此皆屬於菜類非嗜食品至甜瓜、西瓜二項縱多有種者而以上無砂性氣候過寒之故結實太小味亦不佳非本地相宜出產也

第三節 果屬

縣境無佳果品茲畧舉其類約分六種曰山梨曰李子曰榛子曰山葡萄曰山丁子曰山李紅試列其色性形狀於下

第一項山梨 按山梨熟於秋末大如核桃初熟時皮色青黃味酸而澁甚不適口惟採收後蓄之數十日則皮色微黑肉質稍柔尚可取食也

第二項李子 熟於中秋形略小於山梨色間紅黃皮甚薄肉質柔含水甚多酸甜適口本地果品以此為最上

第三項榛子 按榛子亦為木果品熟於初秋形略大於蓮子色褐白皮堅厚似核桃炒食其仁芳香適口並可以用作糖餠

第四項山葡萄 按山葡萄熟於中秋形似櫻桃而略小皮色油黑肉中含水極富味甘酸微澁核甚多食之不能適口

第五項山丁子 按山丁子熟於秋末形圓小似山葡萄皮色深紅初熟時肉質強味酸微

澁惟採蓄十數日則肉質柔皮稍綿甘酸適口

第六項山李紅 按山李紅狀似山丁子而稍大熟於中秋皮色深紅肉間紅白性綿柔味甚酸而稍甜肉少核多非佳果也

第四節 花屬

縣境山野所產之花無屬於木本者茲姑就草本花列叙如下

第一項芍藥花 按芍藥分紅白二種白芍藥朵大如茶盞瓣極薄中分數層開於舊曆五月間約十餘日而卸至紅芍藥則其朵瓣略小色亦不及白芍藥之鮮明故本地之愛花者咸栽白芍藥

第二項百合花 按百合花為大紅色鮮明耀目惟本地山野之所產朵小瓣細在園圃

栽種者亦不甚開展斯亦土脈氣候使之然也

第三項冰涼花 按冰涼花色間赤白朵小瓣單本名未詳惟以冰雪甫消此花即開故土人名為冰涼花

第四項夜合花 按夜合花開於陰歷五月間朵大如酒杯瓣單細日出而開日入而合故名夜合花

說明 除上列各項外草類之開花者尚多惟以形色既不足觀名目又難分晰姑不備載

第五節 草屬

縣境山邊澤畔草類極繁至求其最足以應用而可貴者則莫如靛藍草油包草

苦房草三項試列叙如左

第一項靛藍草 按靛藍草高約二尺餘莖細軟葉尖長為纖維類查本地勞働人民盡以靛藍代屨每逢冬閒用此草絮置其中赤足登之溫暖異常故靛藍草之價值頗昂云

第二項苦房草 按苦房草高約三尺餘莖細葉密人民築室用以苫頂風雨不能侵入經久如故故本地草房之溫暖勝於瓦房數倍

第三項油包草 按油包草專為本地油房榨油時包裹原料之用故以得名考此草之形狀與靛藍草相似而莖葉之尖細柔綿過之人民採置後整束成把掛於簷前令乾以待冬春兩季賣給本地榨油商舖其價頗昂云

說明 除上列三項外其餘各草類皆不過為飼畜燒柴之用而已似無庸備叙

第六節 藥屬

縣境山中所產藥屬甚多茲列數如左

黃芪 黃柏 黃精 白芍 赤芍 百合 防風 遠志 柴胡 地丁 狼毒

車前 五味 胆草 益母草 人參 此種藥品本地雖有甚不易得且無佳苗不過僅備其類而已

說明 以上所列各藥其形色性質備詳於本草藥性諸書姑免煩叙

附鹿茸 按鹿應列於獸屬但其茸角為一種高貴藥品且為本地大宗出產故附於此

考茸角有馬鞍輪小茄包等名目而以俗所呼四平頭者為最上蓋此項茸角血液已足精華未洩正適中之時也查四平頭之製出分為蠟片血片兩種蠟片光白如蠟為茸端之

最嫩者血片色赤似血週邊茸毛細密其平面滿排小孔若虫蝕者然性純陽善補可與

人參並用但此項茸角又有山鹿家鹿之分家鹿茸其性力薄弱價值亦低於山角數倍

用者不可不詳辨也據本地以打茸角為生者言家角其周圍之茸毛斜鋪角上若

山角則其毛直立不倚云

第七節 木屬

縣境山中所產木材以松楊為大宗故本地以採木為業者分紅皮子白皮子兩幫紅皮幫即以砍伐松樹為主白皮幫即以砍伐楊樹為主考縣境東呼蘭河上游有所謂大硬者即木材之聚會處每逢春暖河開之時木商將所收之木編聯成排運往呼蘭哈爾濱等處銷售獲利頗厚惟河水漲落不等水過漲時則木排有冲散之虞水過落時則木排有擱淺

之虞故木商亦常有虧累云若水陸交通上再稍形利便誠無窮之利源矣

說明 除松楊外若柳榆樺柞等木所產亦多但此數項質材皆弱不便運銷他處只供本地之取用而已

第八節 鑛產

據實業家調查縣之東南境紅石碕子有石膏鑛一處鑛苗甚旺鑛質亦佳惟以倡辦無人迄未開採此外縣境並無其他鑛產

按前鉄山包界大馬鞍山等處煤產頗富並嘗於石層上見有光明薄葉檢合一處形色略如亞鉛係為一種金類鑛質但現以鉄驪設治不屬於慶城轄境故未便採入

第九節 鳥屬

按鳥分家禽野禽二種縣境所有屬於家禽類者則鷄鴨鵝四項卵育頗繁今以平均計算每戶約畜鷄二十隻鴨四五隻鵝兩隻鵝二羽焉至於野禽則惟雉一項產出最多本地名為野鷄每逢舊歷冬臘月間鄉村壯男兒晨起出獵日暮始歸獲得此項野味以供一家肉食亦快事也

說明 查以上所列鳥屬其卵肉可以供食其毛羽亦可供用皆與人民之生計有關故詳叙之至烏鴉燕雀之屬及山禽水鳥之足以供娛玩者名目繁多難以備載

第十節 獸屬

縣境獸屬有家獸野獸山獸之分茲列於左

第一項家獸類 按家獸有馬、牛、驢、驘、犬、豕、羊、貓八項今以全境計算每年產額馬約

六萬四千一百頭牛約九萬一千頭羊合山羊綿羊二種約二萬七千六百五十頭驢約一萬六千五百頭驢約一萬六千頭豕約三十萬零二千二百頭犬貓未得確數

第二項野獸類 野獸有狐、兔、麇、獾、黃鼯、狼五種按此五種惟狐與黃鼯狼之用最大蓋狐皮可以製裘黃鼯狼之尾可以造筆故也

第三項山獸 山獸之最猛毒者有熊、虎、狼、野猪四種其體大而性最柔馴者則有鹿其最可珍重者則有貉子、獾、獺、貂、鼠等類按貉子每皮一張約值銀三四兩獾獺每皮一張約值銀六七兩水獺每皮一張約值銀十餘兩貂鼠每皮一張約值銀二十兩亦本地一大宗出產也

第十一節 鱗介屬

縣境水產動物屬於鱗類者有鯉、魚、鯽、魚、白、魚、胖、頭、魚等屬於介類者有蛤與水螺二種考縣境東北界小伊古密河之上游有一支流其中所產之蛤身形長大且殼內多含蛤珠亦一特產也

第十二節 蟲屬

縣境蟲屬惟蜜蜂一種最有益查蜜蜂之巢多壘於山僻枯樹中其大如斗每逢秋末入山採蜜之民以香薰蜂令避去割其巢三分之二約數十斤煉成蜜蠟其實頗良

縣境大疙疸山內產蛇最多往往一穴數條或數十條不等而他處則從未一見蓋其地性然也

說明 除上列二項外其餘蟲類雖多既無何等關係亦無特異之點足資研究姑不備載

第二編 建置志

第一章 城池

縣城舊名餘慶城未設治之前名為餘慶街按街基創於前清光緒八年當創立之初即周圍掘濠以備非常至於光緒十二年經府經歷孫新第於濠內周圍築有土牆並修治東西二門此本地有城池之始也迨光緒三十二年改設縣治時土牆業已全行倒塌於是知縣事王令耀昆重展城濠整理四門而城之面積始定至民國二年王令耀昆復將城濠開掘一次使深寬視從前加倍並同時於縣治北面西偏修一小北門以便往來遂

成今日形勢今按縣治周圍有池無牆垣門分為五曰東門曰西門曰南門曰北門曰小北門自東門至西門縱三里八自南門至北門橫一里九池深八尺口寬一丈底寬六尺周圍十二里城內街道居中有東西大街以南為前二道街以北為後二道街穿心十字南北街一道曰大十字街大十字街以西之南北街曰小十字街綜按城內所有縱橫街道惟東西大街商號稠密若大小十字街內則惟數家飲館小店及澡塘成衣舖而已至前後二道中則全係本地住戶

附環城形勢

環城惟東西二門外居民稍多畧成街道然亦未有商舖南則地勢高低不等房舍零散不齊甚無足觀北則人煙寥落附城一片野田而已

第二章 津梁

縣境河流縱橫津梁不可不備惟查各處所有津梁多係民間自立規模狹隘只以便城鄉之往來與鄰境不盡有直接關係茲特叙列於左畧以見域內交通之衝

津

一呼蘭河善家船口在城東北距城六十里

一呼蘭河盧家船口在城東北距城二十里

一呼蘭河王家船口在城正北距城十八里

一呼蘭河李家船口在城正北距城十八里

一呼蘭河赫家船口在城西北距城二十五里

一呼蘭河冷家船口在城西北距城十五里

梁

一拉林清河橋在城東北二十里係民間聯木建修

按此橋西南大路直通治城東達安邦河越穩水河以至銑山包界

一疙疸山橋在城正東十八里拉林清河係民間聯木建修

按此橋西通治城東北便路與拉林清河橋大路相合以達安邦河

一鄭家大橋在城東南三十里拉林清河係民間聯木建修

按此橋西南便路通格木克河越雙銀河以達巴彥界

一安邦河橋在城東北四十里係民間聯木建修

按此橋東北大路東南便路俱通穩水河以達鞍山包河

一安邦河李玉福大橋在城東南六十里係民間聯木建修

按此橋東南便路通半截河過河南折大路以達東興鎮界

一格木克河第一橋在城東南三里係民間聯木建修

按此橋西南便路通雙銀河過河西北去便路通綏化西南去便路通巴彥

一格木克河第二橋以與前橋名稱相混故特以第二別之在城西南一里八係民間聯木建修

按此橋南行便路與西北通綏化西南通巴彥之便路相合

一羅鍋大橋在城西三十里格木克河係民間聯木建修

按此橋西北大路通胡家店以達綏化縣城

一苗家大橋在城東南二十五里格木克河係民間聯木建修

按此橋東北便路通拉林清河西南便路通雙銀河

一馬家大橋在城正南五十里雙銀河係民間聯木建修

按此橋東北便路通格木克河西南便路通巴彥界

說明 以上所列各津梁俱無法定名義惟鄉俗自就設立之人或所在之地互相稱謂以為通用之名號而已

第三章 壇廟

縣境開闢未久並無崇壇古廟其在前清同治光緒年間所立者惟關帝廟最盛然又多前殿關帝後殿娘娘娘娘不知果係何神出身何代但俗傳為殷時之

三霄女云茲姑叙列於左藉此亦可考見本地之人民之心理焉

一城內關帝廟在西街路南為前清光緒十四年劉道師體雲所創立形式初極簡畧迨光緒二十三年重修一次始壯觀瞻按此廟居中關帝正殿三間左右配殿各一間左為火神右為大仙大仙者即俗所稱之胡仙也正殿前有馬殿三間即關帝當日所騎之赤兔馬也馬殿西有城隍殿一間城內喪家必先報送死者亡魂於此焉

廟產

廟中向無公置田產前後瓦房十五間俱係現在住持道姜赴海自置云

碑記

正殿東西各有碑一通東名十方碑係住持姜赴海於前清光緒丁未年所立以

稱頌各方樂施善士者西名古剎碑係姜赴海於前清光緒丁未年所立以記述其師劉體雲帶產出家之事焉但兩碑字跡雖真而文辭稍欠整齊未便採入

一靈應宮廟在城南格木克段距城二十五里前為關帝殿三間後為娘娘殿三間廟產草

廟房六間周圍垣牆八十大地二十九垧俱係現在住持李明輝自置按此廟立於前

清同治八年後為火燒一次又重修故亦名火燒廟云

一李老道廟在城西北距城三十里前為關帝殿三間後為娘娘殿三間按此廟原係前清同治年間李老道所創立故俗名李老道廟云

一鳳凰山雲霄觀在城西南距城三十里前後正殿三層居中關帝殿三間前為馬殿三間像關帝所騎之赤兔馬後為娘娘殿三間即俗所云之雲霄碧霄瓊霄三霄女

云又娘娘殿西側有胡仙堂一間關帝殿西南有土地祠一間殿西碑一通字跡模糊不可識認蓋為初創廟時之所立久經風雨所摧殘也按此廟原係前清同治四年胡珍太所創修故俗通稱為胡老道廟焉廟產有地六十五畝草房九間俱係現在住持田體山所經理云

一凌雲宮在城南格木堯東段距城三十里中間大殿三間分為三堂居中關帝左為龍王右為娘娘創修於前清光緒十二年廟產有熟地三畝草房三間係靈應宮住持李明輝所兼管蓋因此廟為靈應宮所分出故也。

第四章 廨宇 縣署 舊巡檢署 舊經歷署

慶城縣署在城之南部係首任知事王耀昆於清光緒三十二年建修大堂三間大

堂前甬道東西各有房屋五間儀門外東西兩偏各有房屋五間前為大門計三楹大堂後二堂五間二堂前東西廂房各三間宅門內上房五間上房前東西書房各三間迤東北首花廳五間廳前東偏廚房三間又南辦公室五間辦公室前東偏廂房六間又南原係捕盜營住所現改為監獄計男封七間女封兩間管獄員住室三間看守所三間計署內房屋都為八十二間地基面積連同巡檢舊署計共二千零二十五方丈

巡檢舊署在縣署西偏係前巡檢兼典史馬鴻圖於清光緒三十二年建修大堂三間大堂前東西兩偏各有房屋三間又前為大門一楹大堂後上房五間上房前西偏書房三間東偏廚房三間計署內房屋都為二十一間自巡檢裁撤後係為縣